



INATSISARTUNI

Partii Inuit
Randi Broberg

UPA 2014/150-1
10.4.2014

Pillugu siunnersuut: **Aningaasaateqarfiup aningaasaataasa ilaannit procentit qassit ukiumut atugassiarineqarsinnaasanersut erseqqissaavigineqarsinnaaqqullugu Aatsitassarsiornermi Aningaasaateqarfik pillugu Inatsisartut inatsisaannut nr. 6, 5. december 2008-meersumut allannguutissamik saqqummiussinissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Naaja H. Nathanielsen, Inuit Ataqtigiit)

Partii Inuit maluginiarparput, siunnersuutikkut erseqqissumik oqariartuutigineqartoq, aatsitassarsiornikkut isertitanit aningaasaateqarfiup siunissamut eqqanaarutaanissaannik siunertap, ullumikkut erserlertuttumik sukatigaanera toqqissisimanartinneqanngitsoq.

Naalakkersuisullu akissumminni erseqqissaatigaat, aatsitassarsiornikkut isertitanit aningaasaateqarfiup qanoq atorneqarnissaannik erseqqissaanerunissaq piffissaanngitsoq – ilaatigut naalagaaffik Danmark’imiit tapiissutit, aningaasaateqarfimmiit atuineq naapertorlugu apparnissaat soqutigineqanngimmat.

Partii Inuit ullumikkut siunissaq pillugu naliliisinnaanerpup imal. oqarluaannarluta naliliisinnaannginnerpup tunngavigalugu, pissusissamisoortutut isigaarput, naalakkersuinikkut killiffiit apeqquutilu isummerfigisariaqalersartut ammaffigisutut piareersimaffiginissaat.

Kiisalu Partii Inuit tupinnartuliatut isiginaviannngilarput, aatsitassarsiornikkut isertitanit aningaasaateqarfik immerneqanngitsuussagaluarpalluunniit.

Februar 2014 tusarlerneqarpugut, aatsitassarsioqatigiiffiit ikummatissarsioqatigiiffiillu akileraarutitigut piumaffigineqarneri appartinneqartoq. Naak aatsitassarsioqatigiiffiit ikummatissarsioqatigiiffiillu ullumikkut namminneq killeqanngiusattumik aaliangersinnaareeraat, ilumut akileraartassanerlutik imal. naamik.

Partii Inuit aningaasaateqarfik imaqalissappat, apeqquut soqutigalugu malinnaaffigiumaarparput.

Partii Inuit taama oqaaseqarluta qujavugut.